

## Ruangan Sejarah

# RINGKASAN SEJARAH PERJUANGAN INDONESIA

Kebangkitan umat Indonesia sehingga mencapai kemerdekaan yang disambut dengan megah dan suka rianya oleh umat Indonesia di merata-rata tempat pada 17 Ogos yang lalu di mana-mana mereka ada itu terbitnya daripada suatu langkahan yang sangat cepat iaitu semenjak tahun 1908. Sekalipun lebih dahulu daripada ini ada perjuangan melawan tindasan-tindasan Belanda yang telah berkuku selama 350 tahun itu tetapi umumnya orang Indonesia sekarang mensifatkan bahawa kebangkitan berturut-turut semenjak dari 1908 itu, itulah dia asas perjuangan yang menjadikan negara mereka merdeka hari ini.


Asasnya pada tahun 1908 itu adalah didirikan dengan anjuran Dr Wahidin yang pada masa itu mendirikan pertubuhan yang bernama Budi Utomo. Pertubuhan ini kemudiannya dijalankan oleh Almarhum Doktor Sutomo yang terkenal dengan panggilan “Pak Tom”. Apabila Perang Dunia yang Pertama merebak maka sebagaimana kebiasaan peperangan yang demikian itu adalah memberi peluang kepada negeri-negeri yang terajah itu merebutnya dan pada masa itu pula berdiri Syarikat Dagang Indonesia yang kemudiannya bertukar dengan Parti Syarikat Islam Indonesia di bawah anjuran Almarhum Tuan Haji Umar Said Tjokro Aminoto.

Keadaan dan kemahuan mengambil endah hal ehwal negeri memerhati kepada keselamatannya pada masa yang akan datang adalah menjadi suatu besi berani yang menarik umat Indonesia memerhati keselamatannya pada masa kemudian dan dengan demikian maka terbit daripada beberapa pertubuhan-pertubuhan siasah kalau tidak khilaf di antara tahun 1197-18 telah

didirikan Dewan Rakyat suatu badan perwakilan yang dikehendaki bagi tempat merundingkan perjalanan pentadbiran untuk Indonesia tetapi oleh kerana Belanda hanya menjadikan Dewan Indonesia itu hanya bagi tempat bercakap-cakap sahaja yakni keputusannya tidak dijalankan padahal pada masa itu. Orang Indonesia menghendaki Dewan Rakyat yang ada itu haknya adalah sebagai parlimen. Dengan sebab perselisihan inilah timbul faham-faham “non-cooperation” – tidak mahu berkerjasama-di antara pertubuhan-pertubuhan dengan Dewan tadi.

Kejadian yang berlaku ini akhirnya membawa pula perselisihan di antara pertubuhan yang kuat pada masa itu (Serekat Islam) dengan ahli-ahlinya sendiri. Ahli-ahlinya itu tidak puas hati dengan langkahan pengajurannya yang tidak mahu melawan dengan kekerasan pada hal kekuasaan mereka pada masa itu menurut pendapat boleh mengadakan perlawanan-perlawanan terhadap kepada kekuasaan Belanda. Ketiadaan puas hati ini terbukti apabila terjadi bangkitnya Partai Komunis Indonesia yang hebat terjadi lebih kurang pada tahun 1926 di dalam mana mereka yang tidak puas hati itu tadi telah meninggalkan Partai Serekat Islam Indonesia lalu bersekutu dengan Partai Komunis mengadakan perlawanan-perlawanan yang hebat tetapi malangnya perlawanan itu telah dapat dipatah oleh Belanda yang dengannya mereka-mereka yang didapati sabit melawan pergerakan itu dibuang ke Dekol dan ke lain daerah demikian juga ketuanya Dr Ciftu Mangun Kesummo pun sama diasingkan.

Masa bagi perjuangan itu telah habis dan timbulah pula pada masa itu semangat-semangat baharu iaitu dengan



*Manusia yang melaut itu telah berhimpun semenjak pagi di hadapan Istana Gambir di Jakarta pada 28 Disember 1948 tatkala menyambut ketibaan Presiden Sukarno – Gambar Qalam.*

berdirinya Partai Nasional Indonesia di bawah anjuran Ir Sukarno (sekarang Presiden Sukarno) yang masa itu menganjurkan dasar non-co-operator berhadap kepada Belanda dan di sebalik itu berdiri pula Parindra (iaitu gabungan daripada dua pertubuhan Budi Utomo dan PB I) yang berdemokan berkerjasama yang kemudiannya mereka-mereka dalam golongan berkerjasama ini mengadakan suatu blok kebangsaan di dalam Dewan Rakyat dengan nama “National Block” di bawah ketuan Almarhum Muhammad Husni Tamrin yang telah mengganggu Dewan itu dengan ucapan-ucapannya yang berapi-api yang makin lama sifatnya semakin ke kiri (Progressif) sehingga dengannya menjadikan Belanda tidak berpuas hati kepadanya dengan sebab itulah kematiannya menurut sangkaan kebanyakkhan orang Indonesia pada masa itu dilakukan oleh orang-orang Belanda.

Sebelum kejadian ini ikatan-ikatan Belanda mengongkong

gerakan rakyat semakin giat yang dengannya banyak mereka-mereka yang terkemuka atau penganjur-penganjur yang bersifat atau dipandang berdasarkan tidak mahu bekerjasama ditangkap lalu diasingkan ke tempat-tempat perasingan dan korban ini termasuk di dalamnya Presiden Sukarno, Dr Mohammad Hatta, Syahrir, Mokhtar Lutfi dan lain-lainnya. Sungguhpun begitu semangat perjuangan itu tidak dapat dipatahkan dan sekalipun mereka-mereka yang tinggal tidak dapat bergerak namun semangat mereka itu tidak akan luntur oleh kerana kaum terpelajar mereka itu insaf bahawa pelajaran yang didapat mereka bukannya untuk dijadikan hanya faedah diri tetapi pelajaran yang didapat mereka itu adalah untuk melepaskan tanggungan rakyat yang ditindas atau menjadikan dengan sendirinya suatu kewajipan bagi mereka membela hak watannya dan sebab itulah apabila lumpuh satu, satu lagi yang bangkit mengambil tempatnya sekalipun

sehingga dengan kerana hebatnya semangat mereka maka nama Indonesia yang dahulunya tidak mahu diakui oleh Belanda itu dikemukakan supaya diakui dan bahasa Indonesia minta diiktiraf supaya digunakan di dalam Dewan Perwakilan itu. Tuntutan itu tidak tinggal begitu sahaja tetapi dengan tepat ditunjukkan dengan kelakuan mereka iaitu mereka tidak mau sekali-kali berucap di dalam bahasa Belanda. Demikianlah mereka memuliakan bahasa mereka dengan menunjukkan bahwasanya mereka menggunakan lebih dahulu supaya orang lain kemudian mengiktirafnya.

Masa ini kesudahannya telah tamat dengan berbangkitnya Perang Dunia yang Kedua yang membawa kesudahan negeri Belanda terletak di dalam tangan Jerman. Keadaan orang Belanda pada masa itu tidaklah salahnya seperti kata pepatah “sudah terantuk baharu tengadah”. Mereka mulai memujuk supaya orang-orang Indonesia suka berdamping dan bekerjasama dengannya dan ia mulai memberi kawasan-kawasan yang lebih sedikit kepada mereka tetapi lagu dan bendera kebangsaan mereka masih lagi diharamkan, dinyanyi dan dikibarkan bersama-sama dengan bendera Belanda. Angkuh bangsa Belanda itu masih ada lagi entah kerana semangat penjajahan yang telah berakar berumbi di dalam dadanya itu masih kuat dengan memandang bahawa dirinya masih seorang tuan walaupun kerajaannya sudah tidak bernegeri lagi pada masa itu (pindah menumpang ke London).

Kejadian yang demikian ini tamat apabila Jepun telah menawan Indonesia. Umat Indonesia pada masa itu terpaksa bermuka dua. Mereka terpaksa mengikut kemahuan-kemahuan Jepun tetapi di dalamnya mereka menggalakkan yang demikian itu ialah bagi melatih umat mereka supaya tahu memegang senjata, supaya terlatih sebagai tentera yang apabila tiba masanya (sebagaimana telah dibuktikan) mereka ke tengah dengan senjata menumpahkan darah mereka membela kehormatan watan mereka daripada dijajah atau ditakluk oleh sesuatu penjajahan. Mereka-mereka yang telah bersemangat tentera tadi, sekalipun telah banyak memakan korban oleh kerana



Tuan Malcom Macdonald Commissioner General Timur Jauh bagi mewakili baginda King, Dato' Onn Bin Jaafar (di kanannya) wakil Persekutuan Tanah Melayu dan Tuan Tan Chin Tuan (di kanan Dato' Onn) wakil bagi Singapura tatkala naik di tangga Istana Gambir dalam masa menyambut ketibaan Presiden Sukarno ke Jakarta pada 28 Disember 1949 iaitu sehari sesudah hari penyerahan Belanda kepada Indonesia. - Gambar Qalam.

peratusan orang-orang yang terpelajar mereka tersangat kecil jika dibandingkan dengan peratusan orang-orang Melayu yang tahu membaca dan menulis di Semenanjung Tanah Melayu ini mereka tidak akan redha menggunakan pengetahuan-pengetahuan mereka untuk kesenangan diri mereka sedang rakyat jelatanya menderita. Mereka meninggalkan gaji beribu-ribu yang ditawarkan Belanda kepada mereka sedang mereka lebih suka menerima gaji yang hanya mencukupi sesuap pagi dan sesuap petang asalkan di dalamnya mereka dapat membela kemuliaan rakyat jelatanya. Mereka tidak undur dengan segala ugutan-ugutan bahkan mereka maju, maju dan maju!

Dengan adanya undang-undang Belanda yang ketat maka suara penganjur-penganjur itu di luar tidak dapat lagi disuarakan tetapi suara-suara itu kemudiannya nyaring berdengung-dengung di dalam Dewan Rakyat

menyampaikan cita-cita itu. Maju ke tengah dengan tidak dapat dipatahkan bagi menegakkan isytihar yang telah dimaklumkan oleh Presiden Sukarno pada 17 Ogos 1945 bahawa Indonesia menjadi negara merdeka.

Presiden Sukarno bersama-sama Dr Mohammad Hatta tidak akan mengisyiharkan kemerdekaan negerinya selagi ia tidak mengetahui bahawa umat Indonesia telah sedia berdiri berbanjar-banjar akan memberi darah, tenaga dan air mata mereka itu kerana berkorban mendirikan kemuliaan tanah air mereka sebagai sebuah negara yang merdeka dan berdaulat. Telah sememang adat kepada sesuatu kemerdekaan itu terutamanya kepada negeri-negeri yang telah terjajah tidak akan dapat mengambil kemerdekaannya kalau tidak semangat-semangat mereka tidak dapat dipatahkan, sekalipun di Indonesia itu digugurkan bom atom semangat itu tidak akan patah walau dengan tenaga yang sekecil-kecilnya sekalipun. Setelah satu tumbang, satu lagi bangun dan seterusnya dengan semangat berkobar-kobar dan yang demikian tidaklah hairan di sana, di Indonesia dalam masa mendirikan hak mereka telah banyak korban-korban yang diberi dan jika diriwayatkan dengan satu persatunya tentulah tidak akan dapat digambarkan dengan khayal yang mana pun dengan kerana pengorbanan yang demikian inilah akhirnya sekalipun penganjur-penganjur mereka seperti Presiden Sukarno dan lain-lainnya telah dapat ditangkap dan diasingkan ke Pulau Bangka setelah Belanda menduduki Jogja tetapi rupanya di sini Tuhan yang menyahut doa yang diusahakan dengan tenaga dan kebolehan umat Indonesia itu telah makbulkan doa mereka di dalam mana oleh kerana kejadian-kejadian yang di sekeliling Timur Jauh hari ini sangat keruh menjadikan sebab bangsa-bangsa yang berkuasa di dunia ini bagi menjaga keselamatan mereka pada masa yang akan datang mendesak Belanda supaya menyerahkan Indonesia

itu kepada hak mutlak mereka sendiri yang dengannya penjajahan Belanda yang selama 350 tahun itu tamat di Indonesia pada pukul 5 petang 27 Disember 1949 dan dengan demikian di Indonesia telah diakui sebagai sebuah negara yang merdeka oleh dunia-dunia luar yang duduk sama rendah, berdiri sama tinggi dengan bangsa-bangsa lain.

Sambutan penyerahan itu tidak dirayakan oleh mereka tetapi perayaan itu disambut oleh mereka pada 17 Ogos yang lalu iaitu setelah lima tahun mereka siang dan malam mengadakan pengorbanan, pengorbanan yang dilakukan dengan jiwa yang penuh dengan semangat mereka, semangat yang tidak boleh dipatah oleh apa-apa jua pun. Pada hari itu di sana di sini, di merata-rata Indonesia berkibar bendera merah putih, bendera yang menjadi semboyan kepada bangsa gugusan pulau-pulau Melayu yang pada suatu masa telah dikibarkan oleh Hang Tuah itu di merata-rata telah berkibar-kibar dan pada hari itu di merata-rata tempat di Indonesia. Lagu Indonesia Raya yang mengobar-ngobarkan semangat telah dilakukan berdengung-dengung di merata-rata Indonesia memuja-muja tanah air mereka yang telah mendapat kemerdekaan iaitu kemerdekaan yang telah didapat mereka tidak dengan mengadakan pengorbanan pun.

Barangkali pada masa itu roh penganjur-penganjur mereka yang telah terkorban dan yang telah tidak ada lagi di dunia ini melihat dengan megah dan gembira bahawa apa yang ditanam mereka telah tumbuh, cita-cita mereka telah kabul iaitu Indonesia telah merdeka, berdaulat dan berbahagia. Sungguhpun mereka telah mendapatnya maka sebagai langkah yang kedua tentulah mereka akan memulihkan semula tenaga mereka untuk melawan segala percubaan yang bakal datang bagi melemahkan perdirian tetapi Presiden Sukarno tentu ingat bahawa tidak ada sesuatu iman itu yang tidak dicuba adanya.